

g.

Wenn wir alle mit David beichten vnd bekennen müssen/ Psal. 51. v. 7. Sihe/ ich bin aus sündlichem samen gezeuget / vnd meine Mutter hat mich in sünden empfangen. Darzu denn auch unsere eigene vnd wirkliche sünden mit zugeschlagen sein / das wir klagen! Psa. 106. v. 6. Wir haben gesündigt mit unsern Vätern/ wir haben müßgehandelt vnd sind gottlos gewesen/ vnd müssen bitten vnd flehen: Psal. 143. v. 3. Gehe nicht ins gericht mit deinem Knechte / denn für dir ist kein lebendiger gerecht. Diese sündenschuld ist so groß das sie niemand zehlen noch verstehen kan: Ein ieder muß sagen Psal. 19. v. 15. Wer kan mercken / wie oft er fehlet. Verzeihe mir die verborgene fehle.

h.

Darumb weist vns der *Denarius numerus* in die heilige zehen Gebot/ da sollen wir vns bespiegeln/ vnd gleich wie in einem Register befragen vnd examiniren, welche grosse Item wir / beydes nach der ersten vnd andern taffel gegen Gott vnd dem Nehesten rest vnd hinderstellig verblieben/ da heist es *Prov. 20. v. 6.* Wer wil finden einen der rechtschaffen from sey? *v. 9.* wer kan sagen/ ich bin rein in meinem hertzen? Vnd lauter von meiner sünde? Die schuld ist gar zu groß/ wir müssen klagen mit David *Psal. 130. v. 3.* So du wilt Herr sünde zurechnen/ Herr wer wird bestehen Vnd mit Luthero bekennen
So